

Na osnovu člana 13. Odluke o obimu prava osiguranih lica na korištenje ortopedskih i drugih pomagala koja se obezbjeđuju na teret sredstava Zavoda zdravstvenog osiguranja Bosansko-podrinjskog kantona Goražde (“Službene novine Bosansko-podrinjskog kantona Goražde”, broj: 6/21), direktor Zavoda zdravstvenog osiguranja Bosansko – podrinjskog kantona Goražde **donosi:**

U P U T S T V O

o načinu i postupku za odobravanje izdavanja ortopedskih i drugih pomagala koja se obezbjeđuju u Zavodu zdravstvenog osiguranja Bosansko – podrinjskog kantona Goražde

OPŠTE ODREDBE

Član 1.

Uputstvom o načinu i postupku za odobravanje izdavanja ortopedskih i drugih pomagala koja se obezbjeđuju u Zavodu zdravstvenog osiguranja Bosansko – podrinjskog kantona Goražde (u daljem tekstu: Uputstvo) utvrđuje se način i postupak za odobravanje izdavanja (nabavka i izrada) ortopedskih i drugih pomagala i endoproteza osiguranim licima Zavoda zdravstvenog osiguranja Bosansko – podrinjskog kantona Goražde (u daljem tekstu: Zavod), u skladu sa odredbama Odluke o obimu prava osiguranih lica na korištenje ortopedskih i drugih pomagala koja se obezbjeđuju na teret sredstava Zavoda zdravstvenog osiguranja Bosansko-podrinjskog kantona Goražde (u daljem tekstu: Odluka).

Član 2.

Pomagala iz člana 1. Uputstva koja se osiguranim licima propisuju u skladu sa Odlukom i Uputstvom smatraju se medicinskim proizvodima koji omogućavaju poboljšanje oštećenih funkcija, odnosno ublažavanje ili otklanjanje tjelesnog oštećenja ili nedostatka organa i sistema organa ili nadomještanju anatomskih ili fizioloških funkcija organa koji su nastali kao posljedica bolesti ili ozljede.

Pomagala iz stava 1. ovog člana su medicinski proizvodi individualno proizvedeni, namijenjeni određenom osiguranom licu ili serijski proizvedeni koje je potrebno prilagoditi određenom licu, odnosno serijski proizvedeni namijenjeni svim osiguranim osobama.

Član 3.

Osigurana lica u skladu sa Odlukom i Uputstvom, ostvaruju pravo na pomagalo kod pravnih ili fizičkih lica – proizvođača pomagala, odnosno drugih pravnih i fizičkih lica koji imaju dozvolu za obavljanje prometa na malo medicinskim proizvodima i koji udovoljavaju uslovima propisanim za proizvodnju, promet i distribuciju medicinskih i drugih proizvoda.

Isporučitelj pomagala iz stava 1. ovog člana mora imati proizvodnu dozvolu i/ili dozvolu za obavljanje djelatnosti prometa na malo medicinskim sredstvima u skladu sa Zakonom o lijekovima i medicinskim sredstvima i drugim propisima osim za izradu odnosno promet pomagalima na malo koji se obavljaju po posebnim propisima.

Pomagala koja su Odlukom utvrđena osiguranim licima moraju biti proizvedena, održavana i upotrijebljena prema propisanim uvjetima i za namjenu za koju su proizvedena tako da ne ugrožavaju zdravlje korisnika pomagala.

Pomagala koja se Odlukom osiguravaju osiguranim licima moraju biti upisana u registar Agencije za lijekove i medicinska sredstva Bosne i Hercegovine, a pomagala za koja ne postoji obaveza upisa u registar Agencije moraju ispunjavati druge uslove propisane Pravilnikom o

medicinskim sredstvima.

Osigurana lica ostvaruju pravo na pomagalo na teret Zavoda koja su utvrđena Odlukom i Jedinstvenom listom pomagala i endoproteza (u daljem tekstu: Lista), a na osnovu prijedloga ovlaštenog doktora medicine – specijaliste odgovarajuće grane medicine i ovlaštenu doktor stomatologije – specijalista određene grane stomatologije, te odgovarajuće medicinske dokumentacije ako Uputstvom nije drugačije propisano.

Član 4.

Osigurano lice koje u skladu sa odredbama Odluke i Uputstva ostvari pravo na pomagalo, ima pravo i obavezu koristiti to pomagalo u roku propisanom za njegovu upotrebu (rok korištenja u mjesecima), ako Uputstvom nije drugačije propisano.

Ako osigurano lice namjerno ili zbog nepažnje uništi, odnosno pokvari pomagalo, ne može ostvariti pravo na novo istovrsno pomagalo do isteka propisanog roka upotrebe pomagala.

Član 5.

Ortopedska i druga pomagala i endoproteze iz člana 3. Odluke predlažu ovlaštenu doktori medicine na propisanom obrascu Potvrde (u daljem tekstu: Potvrda)

Potvrda iz stava 1. ovog člana je :

1. Potvrda o potrebi izrade/nabavke ortopedskog i drugog pomagala i endoproteze;
2. Potvrda o potrebi nabavke naočara.

Obrazac Potvrda iz stava 2. ovog člana štampane su uz Uputstvo i čine njegov sastavni dio.

Član 6.

Osiguranom licu Zavod osigurava pomagalo odgovarajućeg standarda i kvalitete iz člana 3. Uputstva, do visine vrijednosti propisane u Listi.

Ako osigurano lice kod isporučitelja nabavi pomagalo veće vrijednosti od propisanog stavom 1. ovog člana, razliku u cijeni pomagala snosi lično.

Član 7.

Osiguranim licima propisuje se pomagalo prema roku korištenja navedenom u Listi. Rok korištenja pomagala računa se od dana ovjere potvrde o pomagalu.

Istekom roka korištenja pomagala iz stava 1. ovog člana osigurano lice stiče pravo na novo pomagalo.

Član 8.

Pomagalo utvrđeno Odlukom i Listom osiguranom licu propisuje, na obrascu Potvrde iz člana 5. Uputstva, doktor medicine na osnovu prijedloga ovlaštenog doktora medicine – specijalista određene grane medicine i ovlaštenu doktor stomatologije – specijalista određene grane stomatologije, zdravstvene ustanove s kojom je Zavod zaključio ugovor o pružanju zdravstvene zaštite.

Doktori medicine iz stava 1. ovog člana imaju pravo propisati pomagalo iz svoje djelatnosti prema vrsti pomagala utvrđenih Listom.

Doktoru medicine za kojeg se utvrdi da je osiguranom licu propisao pomagalo suprotno odredbama Odluke i Uputstva Zavod može uskratiti pravo daljnjeg propisivanja pomagala na teret Zavoda.

Potvrda iz člana 5. Uputstva izdata od strane ljekara iz stava 3. ovog člana, kao i neovlaštenog doktora medicine odnosno zdravstvene ustanove smatra se nevažećom u smislu ovog Uputstva.

Član 9.

Izdavanjem Potvrde, iz člana 5. Uputstva, ovlašteni doktor medicine potvrđuje da osigurano lice na osnovu medicinske indikacije ostvaruje pravo na propisano pomagalo u skladu sa odredbama Odluke i Uputstva.

Član 10.

Potvrda za odobrenje pomagala na propisanom obrascu se zaprima i evidentira u Zavodu zdravstvenog osiguranja Bosansko – podrinjskog kantona Goražde. Uz Potvrdu osigurano lice prilaže sljedeću dokumentaciju:

1. zdravstvena legitimacija osiguranog lica (zbog vođenja evidencije o izdatim pomagalima);
2. nalaz i mišljenje doktora medicine – specijaliste odgovarajuće grane medicine, odobrenje.

Član 11.

Po prijemu Potvrde referent zdravstvenog osiguranja utvrđuje činjenice:

1. svojstvo osiguranog lica;
2. da li osigurano lice ima pravo na pomagalo u skladu sa odredbama Odluke i Uputstva.

Član 12.

Nakon što referent zdravstvenog osiguranja utvrdi da osigurano lice ima pravo na pomagalo utvrđuje sljedeće činjenice :

1. da li je prijedlog za pomagalo izdat na obrascu utvrđenom u članu 5. Uputstva;
2. da li je prijedlog za pomagalo dao doktor medicine na osnovu nalaza specijaliste odgovarajuće grane medicine;
3. da li je na prijedlogu navedena šifra pomagala u skladu sa Listom;
4. da li je obrazac Potvrde popunjen pravilno sa svim potrebnim elementima.

Ako referent utvrdi da na prijedlogu Potvrde nije popunjena neka od činjenica iz stava 1. ovog člana vraća prijedlog ovlaštenom doktoru medicine radi popunjavanja prema Uputstvu.

Član 13.

Referent u Zavodu može izvršiti ovjeru na propisanom obrascu Potvrde tek nakon što utvrdi da je prijedlog za pomagalo ili endoprotezu izdat u skladu sa Odlukom, Listom i Uputstvom.

Član 14.

Osigurano lice obavezno je Potvrdu ovjeriti u Zavodu u roku od 30 dana od dana izdavanja Potvrde.

Ovjerena Potvrda vrijedi 30 dana od dana ovjere, te je u tom roku osigurano lice obavezno naručiti propisano pomagalo kod isporučitelja, a za stomatološka pomagala kod ugovorne zdravstvene ustanove odnosno ovlaštenog doktora stomatologije.

Isporučitelj je obavezan pomagalo isporučiti odmah, odnosno najkasnije u roku od 30 dana od dana narudžbe.

Ako osigurano lice ne naruči pomagalo u propisanom roku ili ovjerenu Potvrdu ne može iskoristiti iz bilo kojeg razloga (naprimjer gubitak, neupotrebljivost Potvrde zbog oštećenja ili nečitljivosti podataka i slično) obavezno je dostaviti novu Potvrdu na ovjeru Zavodu, a neiskorištenu na poništenje, te u slučaju njenog gubitka dati pisanu izjavu pod materijalnom i krivičnom odgovornošću da Potvrdu nije iskoristio, što referent Zavoda unosi u evidenciju.

Član 15.

Rok korištenja pomagala utvrđen je Listom.

- pomagalo mora imati garantnu oznaku kvaliteta prema evropskim standardima, a određuje ga proizvođač;
- pomagalo koje se izrađuje prema mjerama osiguranog lica, a određuje ga isporučitelj pomagala.
- rok trajanja za ortopedska pomagala utvrđen je Listom.
- rok trajanja za pomagalo računa se od dana ovjeravanja Potvrde.

Član 16.

Ako lice nabavi pomagalo suprotno odredbama Odluke i Uputstva i drugih općih akata Zavoda nastali trošak u cjelosti snosi lično.

Pravo na pomagala osigurana lica ostvaruju u skladu sa uslovima i načinom propisanim Odlukom, Uputstvom i drugim aktima Zavoda.

Član 17.

Zavod zdravstvenog osiguranja osiguranom licu izuzetno može odobriti unutar propisanog roka upotrebe pomagala, nabavku novog istovrsnog pomagala prema nalazu doktora za osigurano lice zbog nastalih anatomskih, fizioloških odnosno funkcionalnih promjena, a koje nisu posljedica nekorištenja pomagala, odnosno korištenja pomagala na nepropisan način.

Prije isteka roka pomagalo se može odobriti u skladu sa medicinskim indikacijama utvrđenim Odlukom i Uputstvom, a na osnovu nalaza i mišljenja ovlaštenog ljekara specijaliste određene grane medicine.

Član 18.

Osiguranim licima koja zbog zdravstvenog stanja trajno koriste određena pomagala (trakice i igle za dijabetičare) ovlašteni ljekar specijalista određene grane medicine će izdati odobrenje za navedena pomagala jedanput godišnje, a ovjera pomagala obavlja se na obrascu Potvrde, koju na osnovu izdatog odobrenja propisuje ordinirajući ljekar – ordinarijus, u količini za najmanje razdoblje u trajanju od mjesec dana.

Iznimno, pomagala za probavni sistem, pomagala za urogenitalni sistem i pomagala u slučaju šećerne bolesti mogu se ovjeravati u količini najduže za šestomjesečno razdoblje. Za koje će se razdoblje navedena pomagala ovjeriti u svakom pojedinačnom slučaju utvrđuje doktor – specijalista određene grane medicine. Osiguranik upućuje zahtjev direktoru Zavoda za odobrenje pomagala za duže vremensko razdoblje, nakon čega direktor daje saglasnost te referent zdravstvenog osiguranja

na osnovu iste popunjava Potvrde.

U slučaju da su osiguraniku potrebne veće količine pomagala, u odnosu na Listu, isti upućuje Zahtjev za refundaciju troškova (uz propratnu dokumentaciju) te se Zahtjev razmatra na Komisiji za prava osiguranika i kontrolu lijekova, nakon čega se donosi Rješenje na osnovu kojeg se odobravaju veće količine pomagala.

NAČIN I USLOVI OSTVARIVANJA PRAVA NA POMAGALA

Član 19.

Osigurana lica ostvaruju pravo na ortopedska i druga pomagala u skladu sa uslovima i načinom propisanim Odlukom i Listom ("Službene novine Bosansko-podrinjskog kantona Goražde", broj: 6/21), koji je sastavni dio Uputstva, uslijed medicinskih indikacija, a na prijedlog ovlaštenog doktora medicine – specijaliste odgovarajuće grane medicine.

Član 20.

Osigurana lica ostvaruju pravo na ortopedska i druga pomagala u okviru iznosa naznačenih i utvrđenih sredstava u skladu sa Odlukom i Listom.

Član 21.

Uputstvo stupa na snagu danom potpisivanja.

Broj:
Goražde,

DIREKTOR

Salem Halilović